

# «Projects gigantescs mainan a falliments gigantescs»

Il Comité antiolimpic grischun ha lantschà sia campagna

■ (anr/fa) **Ils adversaris da gieus olimpics en Grischun dubitan ch'ins possia far in'olimpiada senza consequenzas negativas per natira e las finanzas dal maun public. A lur avis stuessan ins spender quellas per projects chantunals.** Els hajan baingea enclatga per l'entussiassem dals sportivs per gieus olimpics en Svizra, han ditg mesemna las represchantas ed ils represchentants dal Comité Antiolimpic grischun a Cuira a chaschun d'ina conferenza da pressa. «Era sch'ils promoturs discurren da 'gieus pitschens ed alvs' essan nus però da l'avis ch'ina olimpiada d'enviern resta in event gigantesch che na s'affa betg en nossas vals muntagnardas», ha ditg *Silva Semadeni*, cussegliera naziunala e presidenta dal comité critic visavi gieus olimpics en Grischun. Preschents eran er il geograf e sociolog *Bruno Walder* che maina la gestiun da Cipra International, la deputada al cussegl grond *Beatrice Baselgia* e *Hanna Bay*, co-presidenta da la Juso Grischun. Ultra dals referents era preschent er *Stefan Grass* che maina il comité.



**Las trais dunnas Hanna Bay, Beatrice Baselgia e Silva Semadeni (da san.) han preschentà lur arguments cunter gieus olimpics en Grischun.** FOTO F. ANDRY

## «Tut auter ch'ina benedicziun»

Per ils 17 dis dals gieus olimpics duvrass grondas infrastructures tecnicas pajadas surtut cun daners dal maun public: «Per noss chantun cun sias numerusas valladas, cun sia cultura ritga, per las finanzas publicas, per il turissem qualitativ, per la natira e cuntrada sco era per las generaziuns futuras fiss questa investiziun tut

auter ch'ina benedicziun», ha punctuà *Silva Semadeni*. Ella ha menziunà l'olimpiada da l'onn 1948 a San Murezzan: «Dal 1948 fin al 1953 è stada la vischnanca sut curatela dal chantun causa ils debits da 5,6 milliuns francs dal temp da guerra ed il deficit dad 800 000 francs dals gieus olimpics che avevan mess sut pressiuin la cassa communal.»

## «Custs betg calculabels»

Era *Beatrice Baselgia* ha menziunà las finanzas, sa dumandond sche la forza dals tschintg rintgs influenzeschia er il pensar raziunal dals umans: «Sche betg, co pon ins avair l'intent da sguazzar almain 300 milliuns dal chapital chantunal ed ina milliarda da la facultad dal stadi?», ha ella ditg, «tantpli che nossa ministra da las fi-

nanzas *Barbara Janom Steiner* ha gia avertì ch'il bilantsch dal chantun prevesia per ils proxims onns cifras cotschnas.» A ses avis fiss la consequenza dals gieus olimpics en Grischun in grond deficit: «Jau pens che betg mo nus, mabain era las autras Grischunas e Grischuns na vulan betg ch'i vegnia spargnà ils proxims onns tar la furmaziun, cultura, fatgs socials ed ambient

per permetter a l'IOC ed ad autras organisaziuns naziunals ed internaziunals da s'enritgir sin nossas costas.»

## «Empermischius illusoricas»

*Bruno Walder*, il directur da la Cipra internaziunala, la quala s'engascha dapi 60 onns per in svilup durabel en ils pajais da las Alps, ha mess en dumonda las empermischuns dals promoturs: «Dapi l'olimpiada dal 1948 a San Murezzan s'han midadas las dimensiuns dals gieus olimpics per bainquant, a las destinaziuns nua che las olimpiadas han lieu restan donnas da l'ambient e gronds debits», è el persvas. Las intervenziuns en la natira ed il bassegn d'energia per ils implants e per la mobilitad s'han sco ch'el ha cuntinuà augmentads fermamain. «A l'IOC manca la voluntad d'organisar gieus olimpics cun effects positifs durabels», ha ditg *Walder*, «perquai è la Cipra cunter ils gieus olimpics 2022 en Grischun.» Era *Hanna Bay* ha menziunà las empermischuns dals promoturs: «Els discurren dals 'gieus per la giuventetgna' e che quest project da milliardas francs saja da grond avantatg per il Grischun», ha ella ditg, «ma ils debits ed ils donnas che l'olimpiada chaschunass na fissan segirmain betg d'avantatg per la giuventetgna ed era betg per las proximas generaziuns.» Perquai han ella ed ils auters preschents recumandà a las votantas ed als votants da dir ils 3 da mars na a la candidatura per gieus olimpics dal 2022 en Grischun.